



Malgrà dus accidents mortals dapli che anc l'onn 2014 ha Barbara Hubschmid, la scheffa da la polizia da traffic dal Grischun, fatg ina bilantscha plitost positiva dals accidents da traffic 2015.

FOTO G. N. STGIER

Ir cun auto sut drogas s'augmenta er tar nus

Statistica accidents stradals

DA GION NUTEGN STGIER / ANR

■ Sin las vias dal Grischun èn capittads durant l'onn passà 0,8% daplis accidents da traffic che l'onn precedent. Total en quai 2218 accidents. Tragic è il fatg ch'ils accidents sin via cun ina fin mortala èn s'augmentads. En tut han pers 18 persunas lur vita. Il dumber da las persunas blessadas è persunter sa reduci per 46 persunas sin in total da 633.

La statistica d'accidents na dastga betg vegnir chapida sco preschentaziun absoluta dals accidents effectivs, ha punctuà Barbara Hubschmid, la scheffa da la polizia da traffic dal Grischun, ier a chaschun da la conferenza da medias. Ils accidents che na vegnan betg annunziads a la polizia na sajan betg registrads en la statistica, ha cuntinuà Hubschmid. A maun dal dumber d'accidents vegnian definidas bunas mesiras per prevegnir ad accidents. Cun agid da questas cifras fetschia la polizia chantunala dal Grischun in'analisi dals accidents e da las ristgas ed erueschia uschia il basegn d'agir, ha ditg Hubschmid. Sch'ins considereschia las persunas participadas als accidents e las repartia tenor gruppa da vegliadetgna vesian ins che la gruppa tranter 20 e 29 onns sco er quella tranter 40 e 49 onns

sajan stadas participadas il pli savens ad accidents da traffic, ha declarà la scheffa da la polizia chantunala da traffic.

L'ultima giada l'onn 1959

L'onn 2015 èn vegnids annunziads a la polizia chantunala total 2218 accidents e quai èn en cumparaziun cun l'onn avant be 0,8% daplis accidents stradals. Cun 633 persunas blessadas è quel dumber sa reduci per 46 persunas. Il dumber total da 633 persunas è vegnì sutpassà en il chantun Grischun l'ultima giada l'onn 1959. Da lez temp importava l'effectiv da vehichels en noss chantun dentant be 13 283 tocs ed oz en quai radund 152 000 vehichels. Da quellas 633 persunas blessadas eran 95 grevblessadas, (stgars 25% dapli) e 538 levblessadas. Tragic è lura ch'il davos onn da traffic èn mortas sin las vias grischunas 18 persunas e quai èn duas dapli che anc il 2014. Da quellas 18 persunas che han pers lur vita sin via èn da preschent damain motociclists, persunter dus peduns.

Adina damain

accidents da traffic sin autostradas

Dals 2218 accidents èn succedids ils pli, ditg pi exact 1258, sin vias principalas. Sin vias lateralas èn quai stads

658 accidents e sin l'autostrada 93 accidents. Ils accidents sin autostradas sa diminueschan dapi l'onn 2012, ha ditg Hubschmid e quai saja in fatg positiv. En 41% dals accidents èn er involvads animals, cunzunt selvaschina. Total en quai stads 930 accidents cun animals, quai ch'è in augment da radund 140 accidents. 1603 accidents da traffic (+9,6%) èn chapitads sin vias sitgas e 1484 (+20,6%) lura dis da bell'aura. Tar ils 2218 accidents èn stads pertutgads per gronda part autos da persunas. Tar 111 accidents stevan ils automobilists sut alcohol e schizunt 11 automobilists avevan almain dus promils. Insumma è il dumber dals accidents sin via pervia da l'influenza da narcotics e da medicaments s'augmentà ferm e quai gist per 39%.

Cun 305 accidents è ina sveltezza memia auta la raschun la pli frequenta per in accident. Novizs automobilists en er l'onn passà stads quels che segnan il pli savens per accidents da traffic. Cun resguardar en la statistica dals accidents stradals las regions, lura è il Partenz al timun cun 296 accidents a la testa, suandà da la Surselva cun 283 cas e Cuira e conturn cun 276 accidents da traffic.